



IROMAG

Odlazni studenti



by IROUNMO

U OVOM BROJU

**DOBROVOLJNO
DARIVANJE KRVI**

**SASTANAK - LJDSKA
PRAVA**

**EDUKACIJA O RODNOJ
RAVNOPRAVNOSTI**

START-UP IDEJE

**GOSTUJUĆE
PREDAVANJE**

POSJETA CRNOJ GORI

Međunarodni praznik rada obilježava se kao spomen na velike radničke prosvjede održane u Chicagu dana 1. svibnja 1886. godine, kada je u sukobima s policijom poginulo više radnika, a osmero je radnika osuđeno na smrt.

Praznik rada je dan kada većina ljudi "tradicionalno" koristi odlazak sa porodicom na dvodnevno ili višednevno putovanje. Dok jedni planiraju ili su već isplanirali piknik, drugi roštiljaju sa društvom.

DOBROVOLJNO DARIVANJE KRVI

By IROUNMO


Kako bi se osiguralo brzo, kvalitetno i sigurno liječenje bolesnika potrebno je uvijek imati dovoljan broj darivatelja krvi, a time i dovoljne količine krvi.

Dana 12.5.2023. god. u organizaciji Unije studenata Univerziteta "Džemal Bijedić" u Mostaru i Džemata "Zalik", a uz angažman i podršku Službe za transfuziologiju KB "Dr. Safet Mujić" održana akcija dobrovoljnog darivanja krvi kojoj se odazvao veliki broj studenata, profesora i naših sugrađana. Ova akcija se održala na Nastavničkom fakultetu u periodu od 10:00 do 12:00.

Unija studenata redovno organizuje akcije dobrovoljnog darivanja krvi, svjesni činjenice da su bolnicama i svim građanima zalihe krvi svakodnevno potrebne.

Na kraju ovog događaja Unija studenata se zahvalila Službi za transfuziologiju, Nastavničkom fakultetu na pomoći pri realizaciji akcije, te svim davaocima na doniranoj krvi!

Glavna poruka ove akcije je : "Neka razlog bude život"



ODRŽAN SASTANAK SA PREDSTAVNICIMA INSTITUCIJE OMBUDSMENA ZA LJUDSKA PRAVA BIH

By IROUNMO

U rektoratu Univerziteta „Džemal Bijedić“ u Mostaru održan je sastanak na kojem su prisustvovali rektorica Univerziteta prof. dr. Alena Huseinbegović, prorektorica za naučno-nastavna pitanja prof. dr. Azra Špago, prorektorica za finansije prof. dr. Armina Hubana i prorektor za međunarodnu i međuuniverzitetsku saradnju prof. dr. Rijad Novaković, te predstavnici Institucije ombudsmena za ljudska prava BiH ombudsmenka dr. Jasminka Džumhur, ombudsmenka Nives Jukić, šef kabineta Mahir Mulagić i stručna savjetnica za međunarodnu saradnju Ivona Ražnjatović.



Rektorica je upoznala goste sa organizacijom i radom Univerziteta “Džemal Bijedić” u Mostaru, dok je sastanak bio posvećen pitanju modaliteta buduće saradnje, posebno u oblasti promocije ljudskih prava i prevencije njihovog kršenja. Posebno je istaknuta važnost utemeljenja zajedničkog djelovanja Ombudsmena BiH kao nacionalne institucije za zaštitu i promociju ljudskih prava i akademske zajednice kroz zajednička istraživanja, projekte, radionice, konferencije i slično, a što može poslužiti donosiocima odluka u procesu utvrđivanja politika s ciljem razvoja društva.

ODRŽANA EDUKACIJA NASTAVNOG I ADMINISTRATIVNOG OSOBLJA O RODNOJ RAVNOPRAVNOS

By IROUNMO

Predavanje "Rodna ravnopravnost na univerzitetu" za nastavno i administrativno osoblje Univerziteta "Džemal Bijedić" u Mostaru, u okviru UNIGEM projekta, održano je 30.5.2023.godine sa početkom u 10:15 sati na Pravnom fakultetu Univerziteta "Džemal Bijedić" u Mostaru, a sa ciljem unapređenja znanja i podizanja svijesti o značaju i poštovanju rodne ravnopravnosti, provođenju UNIGEM projekta te Plana rodne ravnopravnosti na Univerzitetu "Džemal Bijedić" u Mostaru. Projekat "Uvođenje rodno osviještenih politika u visoko obrazovanje" (UNIGEM) finansijski podržava Ambasada Ujedinjenog Kraljevstva.

Predavanje su održale rektorica Univerziteta "Džemal Bijedić" u Mostaru prof. dr. Alena Huseinbegović i univerzitetska koordinatorica UNIGEM projekta za Univerzitet "Džemal Bijedić" u Mostaru prof. dr. Rebeka Kotlo, uz predstavljanje i diskusiju usvojenog Plana rodne ravnopravnosti na Univerzitetu "Džemal Bijedić" u Mostaru, čija implementacija je u toku.

Projekat se implementira sa ciljem prevencije i borbe protiv rodno zasnovanog nasilja, diskriminacije i seksualnog uznemiravanja te osiguranja integriteta i kvaliteta u visokom obrazovanju.



PREZENTACIJA START-UP IDEJA KROZ PROJEKAT SUCCESS

By IROUNMO

U sklopu projekta Success (Erasmus+ CBHE), u četvrtak 18.5. u amfiteatru Mašinskog fakulteta održano je Startup takmičenje, na kojem su odabrana dva tima koja će predstavljati naš Univerzitet na finalnom takmičenju u Sarajevu. Timovi su prezentovali svoje ideje, a komisija je imala zadatak da odabere one najbolje.



Od 5 timova koji su uzeli učešće na takmičenju, komisija je odabrala timove AvengHers kojeg čine studentice Mašinskog fakulteta Adna, Amila i Nejra i Viza za budućnost studenata sa FIT-a Ensar, Eldar i Lejla za finalno takmičenje koje će se održati na IBU (International Burch University) Sarajevo.

Našim predstavnicima želimo sve najbolje na takmičenju, a ostalim timovima koji su učestvovali želimo se zahvaliti i poručiti da nastave i dalje razvijati svoje ideje.



GOSTUJUĆE PREDAVANJE PROFESORA ZBYNEK POLESNY

By IROUNMO

Agromediterranski fakultet Univerziteta “Džemal Bijedić” u Mostaru je bio domaćin gostujućem profesoru Zbynek Polesny sa Fakulteta za tropske agro nauke, Prag, Češka, koji je držao predavanja i terensku nastavu za studente prvog i drugog ciklusa studija.

Studenti kroz rad sa profesorom Zbynekom imali su priliku učiti i raditi na skupljanju i herbariziranju biljaka karakterističnih za područje Hercegovine. Takođe, studentima je omogućen rad sa presom kao i deskripcija sakupljenih biljnih vrsta.

Nakon ovog poučnog ciklusa predavanja i vježbi, studenti će imati priliku savladati praktični i teoretski dio nastavnih jedinica koje se istovremeno proučavaju na našem Fakultetu.

Profesor Zbynek zajedno sa studentima je sačinio anketu za anketiranje proizvođača biljnih proizvoda na pijacama/tržnicama u Mostaru.

Zahvaljujemo profesoru Zbyneku, što je tokom svog gostovanja na Agromediterranskom fakultetu najviše pažnje posvetio radu sa studentima.



POSJETA CRNOJ GORI

By IROUNMO

Zaposlenici Univerziteta "Džemal Bijedić" u Mostaru na čelu sa rektoricom prof. dr. Alenom Huseinbegović boravili su u dvodnevnoj posjeti Crnoj Gori, u okviru koje su posjetili otok Perast koji se nalazi pod zaštitom UNESCO-ove svjetske baštine, Kotor, Budvu, te Tivat i Porto Montenegro. Tokom boravka u Kotoru, posjetili su Pomorski fakultet, organizacionu jedinicu Univerziteta Crne Gore. Predstavnik Univerziteta "Džemal Bijedić" u Mostaru ugostila je prof. dr. Tatijana Dlabač zajedno sa administrativnim i nastavnim osobljem Pomorskog fakulteta koji su predstavili infrastrukturne resurse fakulteta kao što su učionice sa kvalitetnom laboratorijskom elektro-mašinskom opremom i brodomašinskim simulatorima.

Također je upriličena posjeta Centru za zaštitu biodiverziteta Jadrana - Akvarijum Boka u okviru Instituta za biologiju mora.

Nakon druženja i odmora u Budvi, zaposlenici Univerziteta su posjetili Tivat i Porto Montenegro gdje je upriličena šetnja nekadašnjom lukom JNA, koja je 2009. godine izgrađena u prekrasni resort i najveću marinu u Evropi.

Nakon ugodne atmosfere i druženja u prelijepom ambijentu, zaposlenici Univerziteta su stigli u Mostar spremni za nove radne pobjede i uspjehe!



IROMAG



/iro.unmo



@iro.unmo



/iro.unmo

IROMAG TEAM
MIRSADA BEHRAM
LEJLA ŠKALJIĆ
LEJLA REPEŠA
HUSEIN MARIĆ

